

3286


R

846



6

bus



8 R 84 6 <sup>2</sup> 6 <sup>12</sup>



R. 84 6<sup>2 bis</sup> = R 81 B<sup>2 bis</sup>  
Cuv. 328 G

PAROLE  
DE LAISSEE,  
TRAICTE' DE  
BERNARD COMTE  
de la Marche  
Treuifane.

*Non encores iamais imprimé.*

PAROLE

TRAITÉ DE

BERNARD COMTE

de la Marche

Terrain

Il est encore à venir



# PAROLE DELAISSEE,

TRAICTE' DE BERNARD

Comte de la Marche Treuisane.

**L**A premiere chose requise à la secrette science de transmutation est la cognoissance de la matiere, dont est extraict l'argent-vif des Philosophes, & le soulfhre, desquels deux, la souveraine pierre des Philosophes est faicte & constituee.

La matiere dont est extraicte la medecine souveraine & secrette des Philosophes, est tant seulement Or tres-pur, & argent tres-fin, & nostre vis-argēt. Tous lesquels tu vois quotidianement, alterez toutes-fois, & muez par artifice en nature d'une matiere blanche & fachee, en maniere de pierre; de laquelle nostre argent-vif, &

A ij





Souldphre est esleué & extraict avec  
 forte ignition par reiteree destru-  
 ction d'icelle, en resoluant & subli-  
 mant. Et en cest argent vif, sont l'air  
 & le feu; lesquels ne peuuent estre  
 veus des yeux corporels; comme ils  
 soient rares & spirituels: laquelle  
 chose est contre ceux qui cuident a-  
 uoir 4. elemens realement & visi-  
 blement separez en l'œuure, vn cha-  
 cun à part soy; mais tels n'ont bien  
 cogneu la nature des choses, comme  
 entre nous ne se puisse donner ele-  
 ment simple: bien toutesfois cognois-  
 sons iceux par leurs operatiōs, & leurs  
 effects qui sont és bas elemens, c'est à  
 sçauoir, en la terre & en l'eau, selon  
 qu'ils sont alterez de nature close &  
 grosse: par laquelle ils sont muez de  
 nature en nature. Que Or & Argent  
 soient la matiere de nostre benoiste  
 pierre, toutes les sentences des Phi-  
 losophes le disent. Et à reale verité,  
 dit nostre pere Hermes, le pere d'el-  
 le, est le Soleil; la mere est la Lune.  
 Mais plus grand doubte est du tiers  
 Composant, c'est à sçauoir, qui est

cest argent-vif, duquel, avec Or & Argent, nostre compost est faict. Pour quoy sçauoir est à noter, Que toute l'œuvre des Philosophes est diuisee principalement en deux parties, c'est à sçauoir, en la premiere & en la seconde. La seconde partie est par les Philosophes diuisee en la pierre blanche accomplie, & en la pierre vermeille. Mais pource que le fondement de ce noble secret est en la premiere partie, les Philosophes doutans diuulguer ou reueler ce secret, ont faict peu de mention de ceste premiere partie. Et croy que si ce n'eust esté pour éuiter que la science des Philosophes ne demeurast fausse en ses principes, ils se fussent totallemēt teus de ceste premiere partie, ne n'en eussent faict aucune mention. Parquoy s'ils n'en eussent aucunement touché, la science eust esté de tous poincts ignoree & demeuree perie, & fausse en ses termes. Comme ceste premiere partie soit le commencement, la clef, & le fondement de nostre magistere, sans laquelle rien n'est



accompli : laquelle ignoree, la science demeure deceuable & fausse en son experiment. A fin donc que ne soit ignoré ce tres-grand secret, qui est la pierre à laquelle on n'adiouste rien d'estrange, j'ay disposé d'en faire aucune mention totalement certaine & vraye, laquelle j'ay veüe & tenue; Dieu tesmoignant, & verité; laquelle ie cōmets au secret coffre de la sacree ame, sous le peril d'icelle. Parquoy les Philosophes ont appelé ce secret VERBUM DIMISSVM, c'est à dire, LA PAROLE LAISSEE, ou teüe en cest Art : laquelle, à peu pres, tous ont celce. Est donc à sçauoir que la pierre Philosophique est diuisee en 3. degrez, c'est à sçauoir la pierre vegetale, minerale & animale. La pierre vegetale proprement & principalement, ont dict les Philosophes ceste premiere partie, qui est la pierre du premier degré : dont Pierre de Ville neufue, frere de Arnault, dit en la fin de son Rozaire, Le commencement de nostre pierre est l'argent-vif, ou la sulphureité qu'il nous faut auoir

de la grosse substance corporeuse, avant qu'il puisse passer au second degré. Le commencement donc de nostre pierre est, que Mercure croissant en l'arbre soit composé & sublimé en l'allegeant; car c'est le germe volatil qui se nourrir, n'accroistre ne peut, sans l'arbre fix qui le retient, comme le tetin la vie à l'enfant. Il appert donc que ceste pierre est vegetale, comme elle soit le doux esprit croissant du germe de la vigne, joint en l'œuvre premiere au corps fix blanchoyant; ainsi qu'il est dict au Songe-verd: auquel apres le texte d'Alchymie bien notablement est baillee la pratique de ceste pierre vegetale à ceux qui sagement scauent entendre la vérité: laquelle pour certaines raisonnables & iustes causes i'ay obmise à mettre icy.

*Premier degré.*

DONCQUES le premier degré de la pierre Physique est de faire nostre Mercure vegetal, net & pur; qui aussi

est dict des Philosophes Souldphre blanc, non vrant, lequel est moyen de conioindre les Souldphres avec le corps. Et ¶ veritablement, comme il soit aussi de nature fixe, subtile, & nette, est vny avec les corps, & se adhere & ioinct au profond d'iceux, moyennant la chaleur & humidité d'iceluy; duquel ont dict les Philosophes, qu'il est moyen de conioindre les teintures, & non pas de l'argent-vif vulgal; comme tel soit froid, flegmatique, & par consequent destitué de toute operation de vie, laquelle est, & consiste en chaleur & moiteur. Mais pource qu'il est en partie volatil, aussi est-il moyen de mesler les esprits volatils, & de adherer ou se ioindre à la fixe substance des corps; esquelles choses est touchée la cause de sa necessité, laquelle est triple.

La premiere, comme nous ayons à ioindre les deux semences, c'est à sçauoir, male & femelle, il faut que l'un soit meslé à l'autre, par vne naturelle alliance & amour, & par



vne connaturelle spongiofité, en maniere que le plus de l'un soit attraiect par le plus de l'autre, & par consequent que l'un soit meslé à l'autre, & qu'ils soiēt ioincts ensemble. Et pourtant comme ces deux corps, c'est à sçauoir, Or, & Argent, soient faicts moittres par chaleur digestiue, dissolutiue, & subtiliatiue, lors sont-ils de premiere matiere, & simples: & prennent adonc le nom de semence, lesquels sont prochains à generation pour l'impression qu'ils reçoient par leur simplicité & obediēce de la chaleur instrumentalle equipolant & semblable à la naturelle de ce Mercure, formant & seellant iceux à espee d'Elixir, pource que la premiere partie de la Pierre est appelée Elixir.

Ceste premiere partie donques est moyen de conioindre les extremittez du vaisseau de nature ou des residēces proportionnees: auquel vaisseau les esprits doiuent estre transfusez ainçois qu'ils fuyent de nature en nature. En quoy est t... hée la se-

conde cause de sa necessité : car comme la pierre doit estre impreignee d'esprits, il conuient en icelle estre aucune vertu retentiuë & embrasseresse d'iceux, à fin que plus facilement ils soyent meslez aux tres-petites parties des corps. Ceste vertu veritablemēt est en ce Mercure Physique; comme il soit en partie de nature spirituelle, ainçois est vray & pur esprit, depurē & purifié de toute fœculence ou residence terrestre; esprit, dis-je, vray & fix, & en partie volatil; car il contient la nature de l'un & de l'autre feu : laquelle chose manifeste & declare sa ponticité, ou aigreur & composition aigue; laquelle appert en ses operations. Car par celuy Mercure mortifié, est facilement & legerement congelé le Mercure vulgal, comme dict le texte. Toutes-fois il n'est fixe par luy; & pource doit-il estre ioinct au Soleil & à la Lune, & estre fait amy, à fin que ce qui est en luy volatil soit fixé avec iceux corps, c'est à sçauoir, que de ceste chose, qui est composée de tou-



tes ces choses meslees ensemble avec leurs collateraux, puisse directement estre fixé le Mercure du peuple. C'est la cause pourquoy nouveaux corps y sont mis; car ils sont fixes; à fin que le feu composé, qui est dict Mercure sublimé, ou premiere matiere, soit tellement informé du ferment propre qu'il obtiene force de plus longuement perseuerer en la bataille du feu, non obstant son aspreté. Et pource dict l'Hortulan, que ce n'est pas estrange avec lequel il doit estre ioinct, c'est à dire fixé; dont de ce ¶ dict Raymond Lulle, Que l'argent-vif, par nous faict, congele le cōmun: & est aux hommes plus commun que le cōmun, de moindre prix, de plus grande vertu & vtilité, & aussi de plus forte retention: & pourtant dict Geber, Que iceluy est signe de perfection, pource que c'est vne Gomme plus noble que les margarites: laquelle conuertit & attraiect toute autre Gomme à sa nature fixe, claire, & pure; & la faict à tousiours durer avec elle au feu: Et s'esioiit en

iceluy. Parquoy (comme dit le texte alleguant Morien) ceux qui ceste benoiste pierre veulent ou cudent composer sans ceste premiere partie, ils sont semblables à ceux qui sans eschelles veulent monter aux hauts pinacles: lesquels, comme ils commencent à monter, se trouuent tombez en bas, en misere & douleur.

Ce Mercure donc est le commencement & fondement de tout ce glorieux Magistere; car il contient feu en soy, lequel doit estre repeu & nourry de plus grand & fort feu, au second regime de sa pierre. Donques, tant le feu enclos audict Mercure par le premier regime, que le feu qui dedans doit estre enclos par le second, par les Philosophes es choses naturelles, est nommé propre instrument, qui est la seconde chose requise principalement à cognoistre en ce haut magistere, en maniere que la matiere connue dont on doibt l'œuvre commencer, Lon doit premierement enclorre le feu en la matiere volatile, & fixe, en es-

chauffant & coagulant avec dissolution des corps, selon les Philosophes naturels.

Ceste inclusion ou emprisonnement de feu ont les Philosophes appellé, pour son mystere, sous vn autre nom, c'est à sçauoir Sublimation, ou exaltation de matiere Mercuriale, comme en ses nobles vertus, elle soit ia exaltee, & sublimée en ses degrez. Et pource dit Arnaut de Ville-neufue, Que Mercure soit premierement sublimé, c'est à dire, comme Mercure soit de nature basse, à sçauoir, de terre, & d'eau, qu'il soit ramené à nature noble & haute, sçauoir d'air & de feu, qui sont principes tres-prochains de ce Mercure, de l'intention de nature & de l'art. Parquoy quand ceste pierre Mercuriale est ainsi exaltee, & subtiliee, elle est dictée sublimée de premiere sublimation: laquelle conuient encores sublimer avec son vaisseau. Et pource dict Raymond Lulle, au commencement de son Codicille au 2. chapitre du *Vade mecum de numero*



*Philosophorum*: Nous esperons en nostre Seigneur, que nostre Mercure sera sublimé à plus grandes choses, avec addition de la chose teignant iceluy; & son ame sera exaltee en gloire; comme il soit celuy à qui il conuient encores entrer au ventre de sa mere. Aussi il est dict estre né de premiere natiuité; laquelle regarde tout l'ordre des terres Alchymiques. Et les courages des ouurans en l'Art ne sont pas frustrez de ioye. Dont ie te raconte, appellant Dieu à tefmoin, Que comme ce Mercure eust esté par aucuns sublimé, il apparut vestu d'autant grande blancheur comme est la neige des hautes montaignes, sous vne resplendeur d'une tres-subtile crystallinité, dont yssoit tant grande, tant douce & bonne odeur, apres l'ouuerture du vaisseau secret, que semblable ne se treuve en ce monde.

Et ie (qui parle) sçay qu'à mes propres yeux a paru ceste merueilleuse blancheur, & ceste tenve & subtile crystallinité ay touchée de mes  
pro-

propres mains ; & par mon propre  
sens odoratifay odoré ceste merueil-  
leuse douceur ; dont de grand' ioye  
commençay à pleurer dessus , com-  
me tout estonné de ceste merueilleu-  
se douceur. Et pource , benoist soit  
le Dieu Eternel , haut & glorieux ,  
qui tant merueilleux dons a mussé ez  
secrets de nature ; & n'a pas laissé de  
monstrer iceux à aucuns hommes. Et  
ie sçay ( Pere tres-reuerend ) que  
quand tu cognoistras les causes de  
ceste disposition , tu diras , Qu'est-ce  
que ceste nature soit donnee de cho-  
se corrompante , & tienne liée en el-  
le vne nature comme celeste ? Ie ne  
suffis pas à racompter ces merueilles.  
Toutesfois , par aduenture le temps  
viendra ( s'il est expedient ) que ie te  
racompteray moult de choses spe-  
ciales de ceste nature ; desquelles  
escrire icy ie n'ay peu obtenir licen-  
ce du Seigneur de nature.

Donc de ceste nature celeste est  
escrit au premier liure des Prognosti-  
ques , *Est autem in medicina quoddam*  
*celestes donum* , &c. C'est à dire , Veri-



tablement en Medecine y a dons celestes. Mais quoy que ce soit, comme tu auras sublimé ce Mercure, prens le tout frais & recent avec son sang, à fin qu'il ne s'enuieillisse; & le presente à ses parens, c'est à sçauoir, à la Lune & au Soleil; à fin que de ces trois choses, à sçauoir, ☉, Lune, & ☿, nostre compost soit faict, & que le second degré de nostre pierre, qui est dict mineral, commence.

### *Le second degré.*

Si tu veux doncauoir bonne multiplication en tres-fortes qualitez, & vertus minerales, par les operations du second degré, moyennant nature: Prens les corps nets, & avec iceux vnis ledict Mercure, selon le poids cogneu aux Maistres de ce Magistère; & conioins la susdicte eau seiche, qui a soulfhre des elemens; & laquelle est dicte huile de nature, & Mercure sublimé; & subtilié, solut, dissout, & endurcy avec les preparations du premier degré. En degre-

tant, toutes-fois, tousiours la residence & les feces qu'il faict en sa sublimation, comme de nulle valeur.

N'est pas à entendre, toutes-fois, qu'en nostre sublimation la chose sublimée demeure à la hauteur du vaisseau, ainsi qu'est en la sublimation des Sophistes: mais en nostre sublimatiō, ce qui est sublimé est vn petit esleué sur les feces du vaisseau; car la plus subtile, & la plus pure partie nage tousiours sur les feces du vaisseau, & se tient & ioinct au costé du vaisseau; & ce qui est ord & impur demeure au fons par nature; laquelle desire perdre du sien par certain terme d'evacuation, à fin qu'elle soit restituée en mieux, en perdant les mauuaises & impures parties, pour en recouurer des pures & meilleures. Par lesquelles choses appert, la tierce cause de sa necessité; laquelle est, que comme le Mercure soit net, clair, blanc, & incombustible, il illumine toute la pierre, & la defend d'adustion ou de bruslement, & la garde d'estre bruslée; & attempere & modere les ex-

cez de l'ardeur du feu, contre nature, reduisant & ramenant iceluy à vraye attrempance & concorde avec le feu naturel. Car iceluy Mercure Philosophal contient par excellence le feu innaturel. La souueraine vertu duquel est attremplement contre l'ardeur du feu contre nature, & subside ou ayde amiable du feu naturel naturalisant, c'est à dire, conuertissant en nature soy mesme, ou soy faisant naturel, par douce attrempance, avec le feu naturel; laquelle est tres-grand secret, cogneu de tres-peu de gens, dont ce Mercure est dict, terre nourrisse en ce pas: comme il soit le germe, sans lequel la pierre ne peut croistre ne multiplier. Et pourtant dict Hermes, La nourrisse de nostre pierre, est la terre, de laquelle le Soleil est pere, & la Lune la mere; elle monte de la terre au ciel, & derechef descend en terre; de laquelle la force est entiere, si elle est tournée en terre: de laquelle terre, avec les deux corps parfaicts la droicte composition des Philosophes prend naissance & commencement.



Te fuffife donc de ces deux corps; car ils font semblables à la chose qui se & demandee; comme dit Arnaud de Ville-neufue: c'est à dire, Que comme la fin de la pierre soit parfaite, elle parfait le Mercure du peuple, & les autres imparfaits corps en Or, & Argent, en transmuant iceux. Il faut donc necessairement querir ceste vertu, qui sera là où elle est. Or est ainsi qu'on ne la peut plus conuenablement trouuer qu'és corps parfaits. Car si en corps pur & fin n'est puissance, force, ou vertu de transformer les metaux imparfaits en vray Or, pour neant, & en vain, yroit-on querir ou chercher ceste vertu au Cuiure. Semblablement ie dy, de l'Argent, & en tout le genre des Metaux, l'Or & l'Argent seulement sont parfaits, & tous les autres metaux sont imparfaits.

Pour auoir donc ceste Mercuriale substance, en laquelle est ceste parfaite vertu de transmuier en Or & Argent les metaux imparfaits, faut recourir à tes deux corps par-

faictz, non ailleurs. Parquoy est à  
 sçauoir, qu'à la conionction de ces  
 deux corps, est le terme naturel de  
 derniere subtilité, & de transmuta-  
 tion en la premiere matiere de rege-  
 neration. Et pource de ceste conion-  
 ction, comme de premiere matiere,  
 & simple, est faicte generation du  
 vray Elixir. La Lune reduicte en pre-  
miere matiere, est la matiere passive,  
car veritablement elle est l'espouse  
du Soleil, & le Soleil est le mary d'i-  
celle, c'est à sçauoir, en tres-pro-  
chaine affinité. Telle est la conue-  
nance entre le masle & la femelle du  
genre de l'Art; desquels deux est en-  
gendré le Souldre blanc & vermeil  
conglutinant & congelant Mercu-  
re. Certes meilleure creation, & plus  
voisine trāsmutation est tousiours fai-  
cte quand le propre masle est con-  
ioinct avec sa femelle propre, en vne  
nature. Et le masle est ce qui se ioinct  
le plus au profond de la matiere passi-  
ue, par la subtilité naturelle de luy;  
& la transmue plus, & conuertit de sa  
nature en autre nature, c'est à sçauoir,



en nature de Souldphre. Dont dict  
 Dastin Anglois, de ceste conion-  
 ction, Si la femme blanche est mariee  
 au rouge mary, ils s'embrassent in-  
 continent, & se ioignent & accoup-  
 plent ensemble, ils se dissoluent par  
 eux, à fin que ceux qui estoient deux  
 soient faicts vn en vn corps. Ceste  
 copulation est le mariage Philoso-  
 phal, & le lien indissoluble. Pource  
 est-il dict ailleurs, Ces deux sont vn  
 par conuersion, mais qu'ils tiennent  
 vn, c'est à sçauoir nostre Mercure,  
 qui selon aucuns est dict, l'Aneau du  
 fouuerain lien. Aussi est-il dict, La fil-  
 le de Platon, qui conioinct les corps  
 assemblez d'amour.

Compose donc nostre tres-secre-  
 te Pierre, de ces trois choses, & non  
 d'autre; car en autre chose ne gist ce  
 qui est requis de plusieurs. Cest amal-  
 game, ou ceste cōposition physique  
 ainsi traictee, on peut veritablement  
 dire, Que la pierre n'est que vne cho-  
 se. Car tout ce compost est vne mix-  
 tion ou mesleure, dont le prix & va-  
 leur est inestimable, c'est à dire, Que

le prix en est si grād, qu'on ne le scau-  
 roit penser, comme il soit nostre Ai-  
 rain, duquel il est dit en la Turbe, Sça-  
 chez tous ensemble, que nulle vraye  
 teinture n'est faite, sinon de nostre  
 airain, c'est à dire, de nostre confe-  
 ction, qui se fait des trois choses susdi-  
 ctés seulement: & lors commence la  
 seconde partie de nostre tres-noble  
 pierre, & la pierre du second degré  
 qui est appelée minerale. Où il est à  
 noter, que par ce second regime, ou  
 par ceste seconde operation la pier-  
 re, ou le Mercure, qui premierement  
 auoit esté né par la premiere opera-  
 tion, tant clair, & tant resplendis-  
 sant, est mortifié, noircy, & enlaidi:  
 bref il est faict difforme, ou laid, avec  
 tout le compost; à fin qu'il puisse re-  
 susciter avec grade victoire, plus clair,  
 plus pur & plus fort qu'il n'auoit esté  
 premierement. Car ceste mortifica-  
 tion est sa reuiuification; car en soy  
 mortifiant il se reuiuifie; & en soy re-  
 uiuisant il se mortifie. Certes ces  
 deux operations sont tellement en-  
 chaînées l'une avec l'autre, & entre-

laccés, que l'une ne peut estre sans l'autre, comme baille la doctrine Philosophale: car la generation de l'un est la corruption de l'autre. Toute ceste chose, toutesfois, n'est sinon de creer le soulfhre de nature; & reduire le compost en la premiere matiere prochaine, au genre metallique: car comme dit Albert, au liure des mineraux, Il ne faut pas moult distraire ou esloigner la pierre de la nature du metal. Scachez donc, Que ce compost est ceste substance de laquelle se doibt tirer ce soulfhre de nature, par confortation d'iceluy, & nourrissement, en mettant dedans ceste substance la vertu minerale, à fin qu'elle soit finalement faicte vne nouvelle nature, denuée de toutes terrestreitez superflues & corrompantes, & de toutes humiditez flegmatiques, empeschant digestion. Où il est à noter, que selon diuerses alterations, ou mutations d'une mesme matiere en sa digestion, diuers noms luy sont imposez par les Philosophes. Et aussi selon diuerses comple-



xions, aucuns ont appellé ce composé Presure coagulant ou espoississant. Autres, Soulfhre. Plusieurs, Arcenic. Aucuns, Azoc. Autres, Allun & teinture illuminant tout corps. Aucuns autres l'ont appellee Oeuf des Philosophes: car comme nostre œuf est composé de trois choses, à sçauoir, de la cocque, du blanc, & du vermeil; ainsi est composé nostre œuf physique, de corps, ame, & esprit. Combien qu'à la verité nostre pierre soit vne mesme chose, & selon le corps, & selon l'esprit, & selon l'ame. Mais selon diuerfes raisons & intentions des Philosophes, elle est maintenant dictée vne chose, maintenant vne autre. Et ce voulut Platon quand il dit, *Que la matiere flue en infini*, c'est à dire, tousiours, si la forme n'arreste son flux. Ainsi est trinité en vunité, & vunité en trinité: car là sont corps, ame, & esprit. Là est aussi Soulfhre, Mercure, & Arcenic. Car le Soulfhre spirant, c'est à dire, iettant sa vapeur par Arcenic, œuvre en coagulant Mercure. Dont les Philoso-

phes dient, Que la propriété de l'Arcenic est de respirer; & la propriété du Soulfre est de coaguler & congeler, ou arrester Mercure. Toutesfois ce Soulfre, cest Arcenic, & ce Mercure, ne sont pas ceux que le commun vulgaire cuide; car ce ne sont pas ces esprits veneneux que les Apothicaires vendent; ainçois sont les esprits des Philosophes. Comme en ces esprits vulgaires y ait plus d'imperfection & de corruption pour les imparfaicts metaulx, que pour la reparation d'iceux. Parquoy ils ne peuuent donner incorruption ou perfection aux metaulx imparfaicts: laquelle perfection doit dōner nostre medecine. Follement donques œurent les Sophistes qui font leur Elixir de tels esprits veneneux & pleins de corruption. Car certainement en nulle autre chose ne gist la verité de la souueraine subtilité de nature, qu'ez trois choses susdictes, c'est à sçauoir, Soulfre, Arcenic, & Mercure Philosophiques, esquels la reparation & totale perfection des

corps qui doibuent estre purgez  
 gist, & est seulement. Les Philo-  
 sophes ont imposé plusieurs noms  
 à nostre pierre, & toutesfois ce n'est  
 tousiours qu'une chose: pource lais-  
 sez la pluralité des noms, & vous ar-  
 restez à ce compost, qui est à mettre  
 vne fois en nostre vaisseau secret,  
 d'où il ne doibt estre tiré iusques à ce  
 que la rouë elementaire soit accom-  
 plie: à fin que la force & vertu active  
 du Mercure, qui doibt estre nourry,  
 ne soit suffoquee ou perdue aucune-  
 ment. Car les semences des choses  
 qui naissent de terre, ne croissent ny  
 ne multiplient, si leur force & vertu  
 generative leur est ostee par aucune  
 qualité estrange. Aussi semblable-  
 ment ceste nature ne se multipliera  
 iamais, ny ne sera multipliee, si elle  
 n'est preparee en maniere d'eau. La  
 maire de la femme apres qu'elle a  
 conceu demeure close & fermee, à fin  
 qu'il n'y entre air estrange, & que le  
 fruit ne se perde. Ainsi nostre pierre  
 doibt tousiours demeurer close en  
 son vaisseau, ne rien estrange ne luy



doibt estre adiouſté; mais ſeulement  
doibt estre nourry & informé par la  
vertu informatiue de ſa nature, & mul-  
tiplicatiue: non ſeulement en quan-  
tité, mais auſſi en qualités tres-fortes;  
en maniere qu'il faut influer, ou met-  
tre en ladiſte matiere ſon humidité  
viuificatiue, par la vertu de laquelle  
elle eſt nourrie, accreüe & multi-  
pliee. Apres donc que noſtre com-  
poſt eſt fait, la premiere choſe à fai-  
re eſt animer iceluy, en mettant de-  
dans iceluy compoſt la chaleur natu-  
relle, ou l'humidité viuificatiue, ou  
l'ame, ou l'air, ou la vie, par œuvre  
de ſolution & de ſublimation, avec  
coagulation. Comme donc tu as fait  
ton compoſt, il te faut auoir certai-  
ne & propre maniere d'œuurer.  
Comme la chaleur ſoit encloſe en  
ceſte matiere, autrement elle de-  
meureroit vuide du propos, & ſans  
ame, & priuee des tres-nobles, &  
tres-haultes vertus; & par ainſi, elle  
n'auroit point de mouuement à ge-  
neration, comme les autres choſes  
par nature produictes. La maniere de

mettre le feu en ladicte matiere ;  
 est conuertir icelle , de disposition  
 en disposition , & de nature en natu-  
 re, c'est, de tres-basse en noble. La  
 maniere de ceste disposition est faite  
 par propre sublimation, & dissolution  
 de terre, & congelation d'eau, ou in-  
 grossation, ou mortification, ou re-  
 surrection & sublimation és legers  
 elemens; en maniere que tout le cer-  
 cle de ce noble magistere n'est autre  
 chose que parfaicte sublimation; la-  
 quelle toutesfois, a plusieurs parti-  
 culieres operations, annexees & en-  
 chaisnees, enlacees ou ioinctes en-  
 semble. Deux sont toutesfois princi-  
 pales, cloyans tout le cercle; & ce-  
 stes sont parfaicte dissolution, & par-  
 faicte congelation: aussi que tout le  
 magistere n'est que parfaictement  
 dissoudre, & parfaictement conge-  
 ler; dissoudre le corps, & congeler  
 l'esprit. Et ces operations ont telles  
 colligation & alliance ensemble, que  
 iamaïs le corps ne se dissout que l'es-  
 prit ne se congele; ne aussi l'esprit ne  
 se congele point que le corps ne se

dissolue. Dont, comme dict Ray-  
 mond, Tous les Philosophes ont  
 dict, que toute l'œuvre du magistere  
 n'est que dissolution & congelation.  
 Par l'ignorance desquelles opera-  
 tions, plusieurs grands en lettres &  
 sciences ont esté deceus, cuidans en-  
 tendre par la fiance de leurs lettres  
 les cercles de nature, & la maniere de  
 circuler. Il est donc expedient de co-  
 gnoistre la maniere de ceste circula-  
 tion; laquelle veritablement n'est au-  
 tre chose que imbiber, abreuer, ou  
 emboire le compost, selon poids deu  
 de nostre eau Mercuriale: laquelle  
 les Philosophes commandent de  
 nommer eau permanente: en laquel-  
 le imbibition le compost est digeré,  
 dissould, & congelé en accompli-  
 ment naturel. C'est chose veritable,  
 que si matiere de terre doibt estre fai-  
 cte feu, il faut qu'elle soit subtiliee &  
 preparee; & qu'elle soit faiçte plus  
 simple. Ainsi est nostre compost  
 attenué & subtilié, en telle sorte  
 que le feu domine en iceluy: &  
 ceste sublimation & preparation



de terre, est faicte avec eaux subtilles, & souuerainement aguës & aigres; non ayans aucune foetidité ou mauuaise odeur, comme dict Geber en sa Somme, qu'elle est l'eau de nostre vis-argent sublimé & ramené à nature de feu, sous les noms de vinaigre, sel, & alun, & de moult d'autres liqueurs tres-aigres, & d'autres choses semblables iusques à ores muscées & couuertes. Par laquelle eau les corps sont subtiliez, reduits & ramenez à leur premiere matiere & prochaine à la pierre, ou à l'Elixir des Philosophes. Où il est à sçauoir, que ainsi cōme l'enfant au vêtre de la mere doit estre nourry de son nourrissment naturel, qui est sang menstrual, afin qu'il puisse estre multiplié & croistre en quantité & qualitez plus fortes: de mesme doit estre nostre pierre nourrie de sa graisse, dit Aristote, propre nature & sistance. Mais quelle est ceste graisse qui est nourrissment, vie, & accroissement, & multiplication de nostre pierre? Les Philosophes l'ont totalemēt celee, com-

me

me ce soit le grād secret qu'ils ont iur-  
ré iamais ne reueler ou manifester à  
aucun, sinon en leurs liures. Mais ice-  
luy secret ont remis à Dieu seul, pour  
le reueler ou muſſer où il luy plaira.  
Toutesfois ceste humidité grasse  
ou pingueuse, viuifique, ou donnant  
vie, ont les Philosophes appellee eau  
mercuriale, eau permanente, ou de-  
meurante au feu, & aussi eau diuine.  
C'est la clef & le fondement de toute  
l'œuure. De ceste eau mercuriale  
empreignee, ou permanente, est dict  
en la Turbe: Il faut le corps estre oc-  
cupé par la flamme du feu, à fin qu'il  
soit desrompu, despecé & debilité.  
C'est à ſçauoir, avec ceste eau pleine  
de feu, en laquelle le corps est tāt laué  
que tout soit faict eau, laquelle n'est  
pas eau de nuë, ou de fontaine, cōme  
cuident les ignorants & fols sophisti-  
queurs, mais est nostre eau perma-  
nente, laquelle toutesfois sans le  
corps avec lequel elle est ioincte ne  
peut estre permanente, c'est à dire, ne  
peut demeurer au feu qu'elle ne s'en-  
fuye. En laquelle nostre eau perma-



nente est tout le secret de nostre pierre. Car par ladicte eau est nostre pierre parfaicte, pource qu'en elle gist l'humidité viuifiante la pierre, comme elle soit la vie, & la resurrection d'icelle. De laquelle nostre eau tres-secrette est dict en la Turbe, L'eau par elle seule faict tout. Car elle dissould tout, elle congelle tout ce qui est congelable, elle depece & desrompt tout, sans ayde d'autrui: en elle est la chose qui teinct, & qui est teincte. Bref nostre ceuvre n'est autre chose, que vapeur, & eau, qui est dicte mundifiante, ou nettoyant, blanchissant, & rubifiant, & degettant la noirceur des corps, laquelle les Philosophes ont nommee eau permanente, huile fixe, & incombustible, ou qui ne peut brusler. C'est l'eau que les Philosophes ont diuisee en deux parties, l'une desquelles dissout le corps en le calcinant, c'est à dire en le reduisant en chaulx, & en soy congelant; & l'autre partie de ladicte eau nettoye le corps de noirceur, & le blanchit, & rougit; fait fluer ou



courir en multipliant ses parties. Ceste eau est dicte en la Turbe, Le vinaigre tres-aigre, & tres-agu; car c'est vne humidité tres-aguë, emprise & allumee par chaleur viuifiante, contenant teinture inuariable, qui ne peut estre effacee. Ceste eau a nommee Alphidius, Attrempance, ou mesure des sages, & vrine des ieunes coleriques. Ceste eau est moult mussee par les Philosophes sous diuers & plusieurs noms, & si est cognue de peu de gens. Hermes l'a tenue & touchée. Alphidius l'a traittee. Morienus l'a escrete. Le Lis l'a entendue. Arnauld de Ville-neufuel l'a bien apperceüe. R. Lulle l'a feiblement declarée. Geber l'a cogueüe. Le Texte ne l'a pas ignoree. Rasis, Auicenne, Galien, Hippocrate, Hally, & souverainement Albert l'ont sagement mussee. Dastin, Bernard de Graue, Pythagoras, Merlin l'ancien, & Aristote l'ont bien entendue. Et briefue-ment, ceste eau est couronnee vainqueresse, eau secrete, celeste, & glorieuse, dernier & final secret pour

nourrir nostre glorieuse pierre; sans laquelle elle n'est iamais amendee, nourrie, accreüe, ne multipliee: & pource ont les Philosophes celé la maniere de faire ceste eau, comme la clef de leur magistere. Et certainement i'ay leu plus de cent volumes de liures de cest Art, & en nul n'ay trouué la perfection de ceste eau Mercuriale ou permanente. Et si ay treuvé plusieurs vaillans hommes, endoctrinez en ceste science, entre lesquels n'ay trouué pas vn auoir ce secret, fors vn vaillant Medecin, qui me dit, Que par 36. ans il auoit soupiré auant qu'il peust paruenir à ce secret.

De ceste nature est dict, Que à ceste nature est donnee double nature, à sçauoir d'Or & d'Argent, és entrailles desquels, & dedans lesquels, comme au propre ventre de sa mere, le dict Argent-vif est multiplié, logé, purgé & conuerty en Soulphre blanc, non vrant, & non brullant, par l'action de la chaleur du feu, estant là dedans informé regulierement par Art, comme les qualitez du Soul-

phre ayent esté introduictes ou mises  
 en iceluy vif-argent auparauant.  
 Donques ceste eau mercuriale n'est  
 autre chose que l'esprit des corps  
 conuertis en nature de quinte essen-  
 ce; donnant vertu à la pierre, & gou-  
 uernant icelle. Et la pierre, ou nostre  
 compost, est matrice contenante, &  
 lieu expedient, c'est à sçauoir, terre  
 mere, ou vaisseau de nature, retenant  
 vertu formatiue de la pierre enquoy  
 la chaleur naturelle est mise, qui est  
 vertu formatiue yssant du vaisseau  
 par l'esprit quint. Parquoy il est ap-  
 pellé mere & nourrisse, comme don-  
 nant vertu naturelle au Soulphre; &  
 icelle paissant & nourrissant. Cestuy  
 donques est nostre compost en ce  
 vaisseau naturel, auquel les esprits  
 sont transmuez de nature en nature,  
 ainçois qu'ils fuyent, & tant plus  
 sont transmuez & alterez au retinacle  
 de ce vaisseau, tant plus sont esloi-  
 gnez de leur corruption & imperfe-  
 ction quelles qu'elles soient; & plus  
 approchent au terme de purité & de  
 perfection, tant qu'ils retiennent



l'accomplissement de quinte essence. Parquoy ils prennent ou vestent nouvelle nature qui est nette, blanche, pure, desnuee de toute corrosiueté & superfluité terrestre, adurante, ou brulante, & flegmatique euaporable. En telle affinité donc du vaisseau l'humidité de l'esprit en laquelle le deuant dict est enclos par sa viscosité, ou nature gluante, est retenue en adherance ou conionction naturelle, & ferme: & s'eschauffe comme en son humidité radicale, meslée & mortifiée. Et apres, la chose morte resuscite avec sublimation ioyeuse d'enfantement, en soy relevant totalement de nature sanguineuse & amere: lors est-il puissant de se soustenir soy mesme, de soy nourrir & multiplier; comme il soit ia le feu allumé, & nature simple, qu'il conuient nourrir de petit lait, & gras, c'est à sçauoir, de son humidité de vie, dont en partie il a esté engendré, qui est nostre eau permanente, lait de vierge, ou eau de vie, nettoyant le latton, non pas, toutesfois, eau de vie, qui vient de

la vigne ; car elles sont totalement differentes. Elle est dictée neantmoins eau de vie ; car elle viuifie nostre pierre, & la faict resusciter. Elle est aussi dictée sang reincrude, ou faict crud ; menstrue blanchi, nourrissement de l'enfant, viande du cœur, eau de mer, venin des viuans, viande des morts, & argent-vif des Philosophes ; depuré de la feculence terrestre, par sublimation Philosophale. Apres donc que nostre compost est faict, on le doibt mettre dedans son vaisseau secret, & cuire à feu tres-lent, ou sec, ou humide, & emboire de nostre eau permanente, petit à petit, en dissolvant, & congelant par tant de fois que la terre monte feuillée ; laquelle doibt estre apres calcinee, & finalement inceree, en fixant avec ladicte eau, qui est appelée huile incōbustible & fixe ; iusques à ce qu'elle flue, ou fonde tres-tost comme cire. Dont dit Raimond, Que la maniere de la ceration est, que tant de fois soit iteree, ou recommencee sur la pierre la sublimation de la partie humide reser-



ſuee, que la pierre avec ſa propre hu-  
 midité radicallement permanente &  
 fixe, qui iamais ne laiſſe ſon corps par  
 mixtion circulee, donne droicte fu-  
 ſion. Et diſt apres, Parquoy il eſt  
 commandé qu'avec ceſte humidité  
 permanente tu abreuues noſtre pier-  
 re: car par icelle ſont ſes parties fai-  
 ctes claires, comme appert. Car  
 apres la parfaicte mundation ou pur-  
 gation d'icelle pierre, de toute choſe  
 corrompante, & meſmement de deux  
 humeurs ſuperflus: vn c'eſt à ſça-  
 uoir, pingueux, gras, & aduſtible ou  
 bruſſable; & l'autre flegmatique, eua-  
 porable: ladiſte pierre eſt ramenee  
 en propre nature & ſubſtance de  
 Soulphre non bruſlant; & ſans ceſte  
 humidité iamais noſtre pierre n'eſt  
 amendee, nourrie, augmentee, ou  
 multipliee. Et eſt à ſçauoir, que no-  
 ſtre pierre en ſa digeſtion eſt muee en  
 toutes les couleurs du monde, Tou-  
 tesſois, trois ſont principales, dont  
 lon doit auoir cure & ſoing, & non  
 des autres, c'eſt à ſçauoir, couleur  
 noire, qui eſt la premiere, la clef & le



commencement de l'œuure. Du second genre ou degré, la couleur blanche qui est la seconde, & la couleur vermeille qui est la tierce. Pource est-il dict, que la chose dont le chef est rouge, les pieds blancs, & les yeux noirs, est tout le magistere. Notez donc, que quand nostre compost commence a estre abreuué de nostre eau permanente, lors est tout le compost tourné en maniere de poix fondue, & est tout noircy comme charbon. Et en cest endroict est appellé nostre compost, la poix noire, le sel brulé, le plomb fondu, le laron non net, la magnesie, & le Merle de Iean; car lors est veüe vne nuee noire, volant par la moyenne region du vaisseau, en belle & souëtue maniere, estre esleuee au dessus du vaisseau, & au fonds d'iceluy est la matiere fondue en maniere de poix; & demeure totalement dissoulte. De laquelle nue parle Iaqués du bourg S. Saturenin, disant, O benoiste nue qui t'enuoies par nostre vaisseau. Là est l'eclipse du soleil, dont parle Raymond.

Et quand ceste masse est ainsi noircie, adonc elle est dictée, Morte, & priuée de sa forme. Lors est dict le corps mort, & esloigné de son attremplement, comme son ame soit de luy separee. Lors est manifestee l'humidité en couleur d'argent-vif, noir, & puant, lequel estoit premierement sec, blanc, bien odorant, ardent, depuré de Soulphre, par la premiere operation; & maintenant à depurer par ceste seconde operation. Et pour ce est priué ce corps de son ame, qu'il a perduë, & de sa resplendeur, & merueilleuse lucidité qu'il auoit premierement, & maintenant est noir & enlaidy. Pourquoi Geber lors le nomme pour sa propriété, Esprit puant, noir, blanc occultement, & rouge manifestement, le nomme Eau viue & seiche. Ceste masse ainsi noire ou noircie, est la clef, le commencement & le signe de parfaicte inuention de la maniere d'œurer du second regime de nostre pierre precieuse. Pourquoi dict Hermes, veüe la noirceur, croyez que vous auez



esté par vne bonne sente, & tenu bon chemin. Donques ceste couleur de noirceur, monstre la vraye maniere d'œuurer: car en ce, la masse est faicte difforme & corrompue de vraye corruption naturelle: à laquelle s'ensuit generation de nouvelle disposition realle en ceste matiere, c'est à sçauoir, acquisition de nouvelle forme, qui est lucide serenité, ou clarté, beauté, pureté, resplendeur merueilleuse, & fragrante, ou odeur de grand douceur. Où il est à sçauoir, que l'œuure de noircir accomplie, il faut venir à l'œuure de blanchir; qui est vne des roses de ce rosier Physique; de plusieurs desirée, requise, & attendue: toutesfois, comme dessus est dit, auparauant que parfaicte blancheur vienne, toutes les couleurs que lon sçauroit penser en ce monde, sont veües & apperceües en l'œuure, dont il ne doit chaloir, mais seulement de la blancheur que lon doit attendre en souueraine constâce. La voye, toutesfois, & la maniere d'œuurer au noir, au blanc, & au rouge, est tous-





iours vne, c'est à sçauoir, cuire le  
 compost en paissant iceluy de nostre  
 eau permanente, c'est à sçauoir, cui-  
 re le compost blanc d'eau blanche, &  
 nourrir le compost rouge d'eau rou-  
 ge; par laquelle imbibition & dige-  
 stion est extraict de la pierre ceste  
 moyenne substance de Mercure; qui  
 est toute la perfection de nostre no-  
 ble magistere: en maniere que la pier-  
 re doibt estre purgee, non seulement  
 des sulphureitez; mais aussi de toutes  
 terrestreitez, par sublimations d'eaux,  
 calcinations de terres, inhumations  
 & decoctions d'icelles, par redu-  
 ctions entre distillations & calci-  
 nations: & apres le conioindrez  
 avec soulfhre, à luy propre, &  
 par sa mesuree chaleur naturelle, le  
 cuire si longuement qu'il soit conge-  
 lé & priué de toute humidité super-  
 flue, par l'engin de la chaleur natu-  
 relle, & du feu à icelle correspondant.  
 Et apres est sublimé en soulfhre tres-  
 blanc comme neige. Par ce appert,  
 que nostre pierre contient en elle  
 deux substances d'une nature, l'une

volatile, & l'autre fixe. Lesquelles, & chascune d'icelles, les Philosophes appellent argent-vif: pource qu'en l'operation d'icelle pierre, la pierre doit estre parfaictement separee de toutes superfluites bruslantes & corrompantes; & qu'il n'y demeure que la seule & pure subtilité, & moyenne substance de l'argent-vif, congelé, depuré de toute nature sulphurienne de dehors, ou estrange & corrompante: & est faicte ceste depuration quand le corps est tourné en esprit, & l'esprit en corps, par reiteration de calcination, reduction & sublimation, par lesquelles est faicte la dissolution des corps, avec la congelation ou espoississement de l'esprit; & la congelation de l'esprit est faicte avec la dissolution des corps. Et est vne seule operation, par laquelle toutes choses sont faictes, c'est à sçavoir, solution d'argent-vif fix, avec congelation de certain poids du volatil, & ablution d'iceluy avec eau mesuree, & coagulation d'icelle eau en pierre; moyennant & ouurant la chaleur du



masle & de la femelle. Adonc veritablement naist la pierre, c'est à sçauoir, apres la premiere coniōction d'iceux, & non pas deuant, cōme d'homme & de femme. Par ceste operation est le corps depecé & destruiēt, & subtilié, & diligemment gouuerné, tant que son ame subtile soit extraicte de son espoisseur, & tournée en tenu, delié, & impalpable esprit: lors le corps est tourné en non corps; & le non corps en corps: & ceste est la vraye, & tres-vraye inuention de la regle d'ouurer. Il est à sçauoir, toutesfois, que tout corps est dissoult avec esprit agu, avec lequel il est meslé, & auquel, sans doubte, il est faict semblable & spirituel. Et comme cest esprit est sublimé, il est nommé eau, laquelle se laue elle mesme, & nettoye, comme il est deuant dict, en montant avec la tres-subtile substance d'icelle, delaisant les parties corrompantes d'elle: & ceste ascension ont appellé les Philosophes, distillation, ablution, & sublimation. Dont quand la sublimation parfaicte est ac-



complie, la pierre est lors viuifiée de son esprit viuifiant, ou ame naturelle; dont elle auoit esté priuée en noircissant, & est inspirée, animée, resuscitée, reduitte & menée à la dernière fin de toute subtilité & pureté; & en vne pierre crystaline, blanche comme neige, esleuee sur le fonds du vaisseau, tenant au costé dudit vaisseau; les residences d'icelles demeurans au fonds du vaisseau en bas. Ceste pierre crystaline separée de ses residences, cueillez à part, & la sublimiez sans sesdictes residences; car si vous vous essayez à la sublimer avec sesdictes residences, iamais ne les separerez d'ensemble, & ainsi vostre labeur seroit perdu. Sublimez donc sans ses residences, & c'est la terre blanche fueillée, le soulfhre blanc, non vrant, congelant & fixant apres parfaitement le Mercure; & nettoyant tous corps ords, & parfaissant l'imparfait, en le reduisant en vray argent. Ce soulfhre ainsi sublimé, il n'y a blancheur au monde qui excède sa blancheur; car il est desnué de

toutes choses corrompantes; & est  
 vne nature neuue; vne quinte essen-  
 ce venant des plus pures parties des  
 quatre elemens: c'est le soulfhre de  
 nature, l'arcenic non vrant, le tresor  
 incomparable, la ioye des Philoso-  
 phes, la delectation d'eux tant desi-  
 ree, la terre blanche fueillee, &  
 claire, l'oyseau d'Hermes, la fille  
 d'Hippocrate, l'allun sublimé, le sel  
 armoniac, la fille du grand secret, &  
 de nouuel le merle blanc, dont les  
 plumes excedent en lucidité, le cry-  
 stal; & est blanc comme neige, & de  
 grãde resplendeur, de tres-grande &  
 tres-souëfue odeur, de souueraine  
 pureté, netteté, subtilité, & agilité.  
 Le merle blanc Philosophic est d'in-  
 nenarrable vertu; car c'est la substan-  
 ce du plus pur soulfhre du monde,  
 laquelle est vne ame simple de la pier-  
 re, nette & noble, separee de toute  
 espaisseur corporelle, & par grande  
 subtilité despoüillée de grosseur de  
 corps. Ce soulfhre blanc non vrant  
 conuient calciner par le temps de sa  
 seiche decoction, tant qu'il soit tres-  
 sub-



subtile poudre, impalpable, priuee  
 de toute humidité superflue : apres  
 soit incéré de l'huile blanc des Philo-  
 sophes, petit à petit, tant qu'il flue,  
 tres-tost, comme cire; laquelle ince-  
 ration accomplie, qui n'est autre cho-  
 se que reduction à fusion ou à fon-  
 te de la chose qui ne peut fondre,  
 nostre glorieuse pierre des Philoso-  
 phes au blâc est accomplie, fluante, &  
 fondante, plus blanche que neige;  
 participâte d'aucune verdeur, perse-  
 uerante au feu, retenante & conge-  
 lante Mercure; & apres le fixant; tei-  
 gnant, & transmuant tout metal im-  
 parfaict en vraye Lune. Dont iettez  
 vn poids sur mille poids d'argent-vif,  
 ou de quelque metal parfaict, il  
 les conuertira en meilleur argent,  
 plus fin, plus pur, & plus blanc, que  
 de miniere. La maniere de la proie-  
 ction & de la multiplication au blanc,  
 & au rouge, est toute vne. La multi-  
 plication, routesfois, se fait en deux  
 manieres, l'une par proiection en get-  
 tant vn poids sur 100. & tout sera me-  
 decine; de laquelle vn poids conuer-



tit autres cent poidz aussi en medecine parfaite, & vn poidz de ces 100. fait 100. poidz de pur argent, ou de pur or. Il y a autres manieres plus profitables, & plus secretes de multiplier sa medecine par proiection, dont ie me tais à present; mais par multiplication la pierre est augmentee sans fin; c'est à sçauoir, par ses digestions, animations, ou imbibitions d'huile Mercuriale: laquelle huile est aussi appelée de nature des metaux: & ceste multiplication se fait tant seulement en imbibant, ou abreuant la pierre de ladicte huile permanente, en dissoluant & congelant tant quelon voudra; car tant plus sera digeree la pierre, plus sera parfaite, & plus de poidz conuertira; car elle sera plus subtiliee, & en ce est accomplie la rose blanche celestine, soüef-fleurante, & embrassée des Philosophes.

Adonc apres que la pierre au blanc sera accomplie, lors faut dissoudre vne partie d'icelle, & tant calciner selon que veulent aucuns, que par ver-

En de longue decoction ; elle soit  
 tournée en cendre, comme impalpable,  
 ou si deliée que lon ne la puisse  
 tenir coloree en citrinité: apres l'ab-  
 breuer de son eau rouge, tant qu'elle  
 demeure rouge comme corail. Dont  
 Raimond dict en son Codicille, au  
 chapitre de la Calcination de la terre:  
*N'oublie pas à fort calciner en son*  
*feu allumé la matiere de la terre pre-*  
*cogneüe, de ta pierre, avec reiteration*  
*de destruction, distillation d'eau, &*  
*calcination de corps, tant que la ter-*  
*re demeure blanche, vuide de toute*  
*humidité: & apres par plus forte &*  
*plus grande continuation de feu, &*  
*imbibition d'eau, tant qu'elle deuie-*  
*ne rouge comme hyacinthe en pou-*  
*dre; impalpable, & sans tact. Le signe*  
*de laquelle chose est manifestement*  
*monstré, quand à sa derniere calci-*  
*nation, icelle demeure priuee de*  
*toute humidité, en parlant du second*  
*procez, & principal, du second regi-*  
*me, qui est faire la pierre rouge; dont*  
*dict Geber, Qu'elle n'est pas faicte*  
*sans addition de la chose teignant*



icelle, que nature cognoist bien, à  
 sçauoir, sans qu'elle soit abreuee &  
 teinte de ceste eau celeste, de laquel-  
 le est dict au Lys des Philosophes, O  
 nature celeste, commentournes-tu  
 nos corps en esprit? O quelle merueil-  
 leuse & puissante nature! elle est par  
 dessus tout, & surmonte tout; & est  
 le vinaigre qui faict l'or estre vray e-  
 sprit, & l'argent aussi; sans laquelle  
 ny blancheur, ny noirceur, ny rou-  
 geur, ne peuuent iamais estre faictes  
 en nostre œuvre; dont, quand ceste  
 nature est ioincte au corps, elle le  
 tourne en esprit, & de feu spirituel,  
 le teint de teinture invariable, qui  
 ne peut estre effacee. Ceste Eau a  
 nommē Hermes, Eau des eaux: &  
 Alphidius, Eau des Philosophes In-  
 diens, Babylonniens, & Ægyptiens.  
 C'est eau, par laquelle les corps sont  
 tournez en esprit, & en leur premiere  
 nature, ou matiere: & iamais n'est a-  
 mendee nostre pierre sans elle: la  
 blanche sans l'eau blanche, & la ver-  
 meille sans l'eau vermeille. Soit donc  
 la pierre rouge abreuee de l'eau



rouge, à fin que finalement tant par  
longue decoction ou cuisson, que par  
longue imbibition, ou continuel a-  
breuement, elle soit faicte rouge  
comme sang, hyacinthe, escarlatte,  
ou ruby; & luisante comme vn char-  
bon embrasé mis en lieu obscur, &  
finalement que nostre pierre soit  
aornée d'un diadème rouge. Dont  
dit Diomedes, Honorez vostre Roy  
venant du feu, & sa femme, & vous  
gardez de les brusler par trop grand  
feu: cuisez-les donc doucement, à  
fin qu'ils soient faicts premierement  
noirs, mais apres blancs, apres  
citrins, & finalement rouges, &  
dernierement venin teignant. Car  
ces choses doibuent estre faictes par  
diuision de l'eau, comme dict Ægi-  
stus: Je vous commande que ne met-  
tiez pas toute l'eau ensemble, mais  
petit à petit, & cuisez doucement  
tant que l'œuure soit accomplie. Ain-  
si appert que la pierre demeure rou-  
ge de vraye rougeur lumineuse, clai-  
re & viue, fondant comme cire; par  
la teinture de laquelle, l'argent-vif

vulgal, & tout metal imparfait, peu-  
 uent estre teints & parfaits en tres-  
 vray or; meilleur beaucoup que de  
 minieres: en quoy est accomplie no-  
 stre precieuse pierre, surmontant tou-  
 te pierre precieuse; plus noble, & plus  
 somptueuse qu'autre pierre; qui est  
 tresor infini. A la gloire de Dieu, qui  
 vit & regne perdurablement.

FIN.





